

適園叢書

張宗祥



通國書香

楊文祥



唐大詔令集卷第八

宋 宋敏求編

帝王

尊號冊文下

文武孝德皇帝冊文

文武大聖廣孝皇帝冊文

仁聖文武至神大孝皇帝冊文

仁聖文武章天成功神德明道大孝皇帝冊文

應乾聖壽太上皇冊文

文武孝德皇帝冊文

維長慶元年歲次辛丑七月乙未朔十八日壬子金紫光祿

大夫檢校司徒兼太子少保上柱國口公食邑三千戶臣嚴
綬文武官六千二百七十七人等言臣聞天以萬物付聖人
聖人本天意而保乂之惟義皇先天而貞惟軒轅奉天而行
惟堯舜法天而明網緼粹精昭建鴻名以至於夏殷周漢謙
儉服義仁愛忠利亦著稱謂代濟其美當隋之末我高祖神
堯皇帝救拯焚溺應天立極蕩氛昏揚凱澤父教而母育恩
德高肌骨膂天寶季歲賊臣紊常塵起幽陵毒流四方累聖
含弘視人如傷餘枿勢滋專土擅強憲宗因天時順人心舉
武經明大刑連拔堅險顛踣同惡冥冥深宄猶恃榛穢干戈
不得息者縣六十七祀逮我后之御歷紹太宗之求賢審官
舉直錯枉體玄宗之尊師敬道清淨致理法肅宗之循名求

實刑賞以廣德宗之享壽含容博彩虛受而後展嚴於配
玄夷思於法宮從物無私推誠至公霈矣乎廣受寂然乎感
通神武不殺而天下會同昔少康祀夏聿修皇祖之訓周武
繼統務廣文王之聲爰洎宣王克服蠻荆勞來安集洎漢光
武旣平隴蜀聽政忘寐伏惟皇帝陛下以至聖之咨誕啟昌
運重明之業紹開中興豈無避違從風悅化而自革豈無氛
翳大明昇中而自除皇澤暢於九圍文命敷於萬國則向之
數王何足稱哉尙復孜孜庶本不遑勞謙日昃講道求賢議
獄恤刑退讒進直以利物勤人爲政本以檢身戒懼爲化先
自誠而明日慎一日是以天道惟新於景命玄德亟聞於四
方億兆咸曰大哉君心復曰懋哉君功降延喜之□揚仁壽

之風恢帝圖廓皇綱崇鴻名顯無疆不然者何以答上靈之
眷命乎何以惠庶民之懇望乎於是垂白之老緇黃之眾與
侯甸藩衛之士守闕稽顙日以上請臣等所以勤勤懇懇敢
固以言陛下猶堅秉撝抑至於三四不得已而降前詔於是
百辟卿士考天人之意稽典禮之義進而言曰陛下崇儒問
道恭默致此文之明也保大安人感懷夷夏武之彰也嚴恭
寅畏博受廣敬孝之大也宣慈惠和忠恕利物德之盛也臣
等不勝大願謹上玉冊玉寶上尊號曰文武孝德皇帝伏惟
陛下敬天之錫昭聖之功高明有嚴慎德無窮赫赫融融與
天比崇臣綬等誠歡誠懼頓首頓首

文武大聖廣孝皇帝冊文

李逢吉

維寶歷元年歲次乙巳四月甲戌朔二十日癸巳攝太尉銀
青光祿大夫檢校右僕射兼太子少師上柱國天水郡開國
公食邑二千戶臣趙宗儒及文武官六千五百四十一人等
言臣聞自古王者之御極也必上奉乎天地丕承乎廟祧法
天地所以宅八紘嚴宗祧所以垂萬葉非休聲震越不足以
齊燾載非尊稱超卓不足以光祖宗則名實之際不可誣也
肇自上古質文未具號兼三五事本嬴劉其後正閏相承南
北更主僉事因襲而罔圖旌別苟鴻猷旣洽徽數莫申貽諸
裔昆靡所稱謂抑當時臣子之罪非所謂納君於善者皇唐
列聖備有典常高宗而降代享丕號以至於玄宗之治平肅
宗之盪定德宗之烈文憲宗之戡翦先聖之克荷重熙累盛

震邁古昔未有不由斯者已伏惟皇帝陛下濬哲自天寬仁
在躬聖齡方富睿德咸備行懋於朱邸聲飛於青宮始踐祚
而虞舜之大孝聞焉旣郊天而文王之小心著焉竭愛敬於
兩宮示儆刑於四國慎簡名傳優寵直言自嗣位已來百度
惟貞九圍式敘邊烽罔不罷屬國罔不來靈化有肸嚮之助
風雨無伏愆之候至玄至賾可勝道哉由是百辟羣司耆儒
碩生文武臣庶緇黃幼艾殊形一心異聲同辭隳肝瀝膽願
上徽稱其誠至矣吾皇猶惕然三讓不得已而俞焉斯謙尊
而光卑而不可踰者也夫經緯天地曰文則二儀交泰矣剋
定禍亂曰武則八蠻順軌矣格於上下非聖歟通乎神靈非
孝歟臣等恭考庶言強名聖德不勝大願謹奉玉冊玉寶上

尊號曰文獻大聖廣孝皇帝伏惟陛下祇上帝之眷命荷累
聖之儲休外順四夷內從百辟時承昌運昭受鴻名然後躬
大易不已之義思禮經日新之旨鑒口休之至誠考無逸之
格言以緝熙庶績重其文以斥去羣邪盛其武以日達四聰
載大其聖以慎守九廟益廣其孝克儉克難有初有終所疏
者佞所進者忠改遊必省獻替必從無忘我高祖太宗之不
烈以永家邦臣宗儒等誠歡誠懼頓首稽首謹上

仁聖文武至聖大孝皇帝冊文

李德裕

維會昌二年歲次壬戌四月乙丑朔十四日戊寅攝太尉光
祿大夫守司空兼門下侍郎同中書門下平章事臣德裕銀
青光祿大夫守尚書左僕射兼門下侍郎同中書門下平章

事臣夷行金紫光祿大夫守尚書右僕射兼中書侍郎同中書臣珙銀青光祿大夫守中書侍郎同中書門下平章事臣紳及文武百官金紫光祿大夫檢校司徒兼太子太保臣僧孺等六千五百七十四人言臣等聞羲皇首太古之號成湯顯神武之稱我高祖皇王是憲尊名若古詒厥丕訓爲子孫之法豈不善始善述哉矧乃巨唐受命繼體承業理運將至大君以興昊穹所以開至聖也曩者明兩未定重華不協舍胤傳聖深惟至公先后所以昭天命也亦由堯發於唐侯文興於代邸神明之祚不其難乎伏惟皇帝陛下清明溥鬯光耿四海玄德莫鄰天休大賚日角見表志氣如神爰初定命正心理物如辰居其極而天下無邪矣由是昭德塞違尊賢

遠佞禹不自滿成不敢康罔遊於田不邇於色自閨壺以施
王教由家道而形國風去比周核名實摯權綱擇聖紀修舊
典協誠質挖嘉壇款太一進正臣以端治表禮故老以求讜
言遠無蔽獄近無留令祈玄祖而膏雨降祀靈獄而嘉穀登
省刑罰而蓬宇消發倉廩而螽螟息去歲龍旗承祀大輅親
郊捧玉瓚而一獻光靈來格振金石而六變魄寶昭臨然猶
古訓是學緝熙於道天文炳煥雲漢其章溫恭敬遜承太任
之教和樂愷悌洽戚藩之心德風偃於羣黎威霆動於絕域
又以敬養不逮於是長樂昭配未升於禰宮每懷嗣徽蒸蒸
而纂所以奉天若慈訓對越兩儀因心立制永錫其教寬虔
劉之罪興惻隱之仁迴霜收電爲之反汗及單于慕義景附

朔邊耀德戢兵兼臨是受至於備文物展國容莫不先甲而
布甘澤丁辰而廓陰翳和景晏溫卿霽網緼斯所謂神祇之
心應矣天人之際交矣於是服冕之士戴鵠之倫暨藩衛邦
伯黃髮鮐背不謀而進曰陛下玄默天晬輝光日新大矣孝
熙四極爰臻而應誠宜玉版溫潤鏤鴻名之德神寶焜耀薦
萬斯之年丕矣大典不可辭也陛下猶謙推固拒至於三四
羣臣不已乃曰俞哉夫徧覆苞含之謂仁極深研幾之謂聖
憲度著明之謂文蠻夷震疊之謂武威而遂通之謂神無思
不服之謂孝臣等不勝大願謹奉玉冊玉寶上尊號曰仁聖
文武至神大孝皇帝伏惟陛下乾健不息謙尊而光樂戒其
耽禽戒其荒壽乃侔於殷宗俗乃厚於成康貽燕後昆受福

無疆臣德裕等誠懽誠懼頓首頓首謹言

仁聖文武章天成功神德明道大孝皇帝冊文

李德裕

維會昌五年歲次乙丑正月己酉光祿大夫守太尉兼門下
平章事臣德裕光祿大夫守尚書右僕射兼門下侍郎同中
書平章事臣絳朝議大夫檢校尚書右僕射兼中書侍郎同
中書門下平章事臣夷讓朝議大夫守中書郎中兼戶部尚
書同中書門下平章事臣崔鉉及文武百官大中大夫守太
常卿臣孫簡等六千二百二人言臣等聞在昔周宣獫狁內
侵四牡薄伐以定王國則詩人大其功暨乎漢宣北夷乖亂
呼韓慕義郅支遠遁則簡冊著其美惟此二代稱爲中興間

者開成之末星字如雲螟飛蔽天先帝戚之黎人懼焉乃授
至聖遺大投艱迄茲成功厥有冥數伏惟仁聖文武至神大
孝皇帝表應龍翼粹含乾綱神全而正氣凝宇而定天光發
智燭千里動必察微心鏡萬機物來斯應於是五材用四維
張建中和之極綴前聖之綱樞重機修法制刑御家之理無
出梱之言銷讒邪遠巧佞斥背公之黨退好怪之人內嚴體
貌增堂陛之峻外絕締交去輔車之勢古所謂受命於天惟
舜獨也已又曰一心定而萬物服惟陛下得之曩者北狄矜
功耗蠹中國種類盤互根柢封殖異術肺附縞衣如荼扶邪
作蠱浸淫宇內倒懸不解百有餘年旣而龍祠禋祀攜國款
塞質帝女蹙海疆有狼顧平城之心鯨吞盛樂之志爰命梟

將搴旗刈旃兵鏖穹廬火烈荆榛颺屬幙碎輶輓六羸逖逃
貴主生還剗滅妖迹剿除醜類故明王結髮冠帶入臣堅昆
稽首鞮譯來獻而又奸臣放命二紀陸梁據太行之固下窺
洛邑通故絳之道旁睨近關樹其遺孽以竊兵柄議者僉曰
精甲十萬積穀十年泉魚不察湯網宜懸陛下雄斷霆聲羣
疑冰釋揚清風以掃雲鼓迅雷以破山任馮異則拔天井而
震上黨杖吳漢則發突騎而傾邯鄲壺關失嶮山東奪魄屬
有戍邊叛將竊發參墟人心搖蕩異議放肆陛下臨朝而言
曰二寇獲罪於天余所不捨未三旬而定晉陽纔朞年而滅
潞子不以金購狝將多降不勞師克粵首馳報非至德感物
孰能臻此乎由是臺宰百辟藩屏將帥上言曰成伐東夷而

肅愼來賀景翦七國而王室乃安莫不始於武功終致刑措
將以禋上帝薦祖宗且受鴻命以答玄貺陛下猶謙而五讓
之勤罔已乃屈已以俞之雲漢爲章所以昭法度也神明其
德所以成教化也巍乎有功帝堯之則也勤於大道玄祖之
訓也臣等不勝大願謹奉玉冊玉寶上尊號曰仁聖文武章
天成功神德明道大孝皇帝伏惟陛下不有其名以保其成
不德其功以戒其盈享殷宗之福致周道之平熙我王度永
振金聲臣德裕等誠懼誠懼頓首頓首謹言

應乾聖壽太上皇冊文

張弘清

維永貞二年歲次景戌正月景寅朔皇帝臣某稽首再拜奉
冊言臣聞上聖玄邈獨昭乎希夷強名之極猶存乎言象豈

足以表無爲之德光不宰之功然稱謂所施簡冊攸著涵泳
德澤感於精誠願奉鴻徽有以自竭伏惟太上皇陛下大侔
立元業纂皇極膺千載之休歷承九聖之耿光宣昭化元發
揚大號政有敦本示儉慶有格天漏泉恩翔春風仁育羣品
而成功不處褻裳去之付神器於沖人想汾陽以高蹈體堯
之德與神同符其動也天其靜也地巍巍事表無得而言焉
顧茲寡昧屬膺大寶懼忝傳歸之業莫伸繼述之志夙夜兢
畏惟懷永圖今天下幸安皆睿訓所被而未極徽號孰報君
親是以臺臣庶官文武之列抗疏於內方伯藩守億兆之眾
同詞於外請因壽歷以播鴻名臣不勝大願謹上尊號曰應
乾聖壽太上皇當三朝獻壽之辰應五紀啟元之始光膺徽